




十駕齋養新錄

增5
608
7



明 1 卷 5
608
卷 5



十駕齋養新錄卷十一

北文選魏東鼓非西鼓矣其陳嘉定錢大昕吳則刻會

史記貨殖傳江南豫章長沙又言江南卑溼丈夫早夭皆謂

今湖廣江西之地項羽本紀江東雖小縱江東父老憐而王

我今人所謂江南古之江東也

東江亦在江東也

漢書王莽傳南郡張霸江夏羊牧王匡等起雲杜綠林號曰

下江兵是南郡以下皆可云下江也李密與王慶書上江米

船皆被抄截通鑑載隋煬帝之言曰朕方欲歸正為上江米

船未至注夏口以上為上江是武昌以上皆可云上江也中
隨又史記正義三江者在蘇州東南三十里名三江口一江
西南上七十里至太湖名曰松江古笠澤江一江東南上七
十里白蜺湖名曰上江亦曰東江一江東北下三百餘里入
海名曰下江亦曰婁江是婁江東江亦有上江下江之名

三楚

史記貨殖傳自淮北沛陳汝南南郡此西楚也彭城以東東
海吳廣陵此東楚也衡山九江江南豫章長沙此南楚也據
此文彭城是東楚非西楚矣項羽都彭城而東有吳廣陵會
稽郡乃以西楚霸王自號者羽兼有梁楚地梁在楚西言西

楚則梁地亦在其中也又攷三楚之分大率以淮為界淮北
為西楚淮南為南楚唯東楚跨淮南北吳廣陵在淮南東海
在淮北彭城亦在淮北而介乎東西之間故彭城以東可稱
東楚彭城以西亦可稱西楚也又孟康漢書注舊名江陵為
南楚吳為東楚彭城為西楚高帝紀太平寰宇記楚文王徙都
于郢故江陵是為西楚漢封元王交於彭城是為東楚又封
屬王胥于廣陵是為南楚此又一說與史記貨殖傳不合

三蜀

左思蜀都賦三蜀之豪時來時往劉逵注三蜀蜀郡廣漢犍
為也本一蜀國漢高祖分置廣漢漢武帝分置犍為

兗州

漢之兗州刺史治鄆城劉宋以後徙治瑕邱相沿至今驗其封畛實禹貢徐州之域與古兗州無涉也

山東

秦都關中以六國為山東賈誼謂秦并諸侯山東三十餘郡又云山東豪俊竝起而亡秦族矣是也漢書山東出相山西出將亦泛指函關以東非今所稱山東也然漢時亦有稱齊魯為山東者如酷吏傳御史大夫宏曰臣居山東為小吏時甯州為濟南都尉儒林傳伏生教齊魯之間學者由此頗能言尚書山東大師亡不涉尚書以教則齊魯之號山東非無

因矣

今山東省於唐為河南道地宋改為京東路又分東西兩路東路治青州西路治兗州而東昌武定兩府臨清及德州唐宋皆別屬河北蓋唐宋以前大河故道皆由千乘入海唐宋為棣州今武定府今東曹濮齊青在河南岸澶州今開昌今東貝今清德棣在河北岸觀河南河北分界而河之經流了然在目矣

湖北湖南

宋荆湖分南北路岳澧鼎辰沅皆屬北路施州別屬夔路而南路所領有全州皆與今分界異

四川

明四川布政司所領有遵義府今改隸貴州鎮雄軍民府今為鎮雄州屬
雲南昭烏蒙軍民府今為昭通府屬雲南烏撒軍民府今為威寧州屬貴州大定府
東川軍民府今為東川府屬雲南

分天下為路

宋史地理志至道三年分天下為十五路天聖析為十八元豐又析為二十三志所云路者以轉運使所轄言之若慶歷元年分陝西沿邊為秦鳳涇原環慶鄜延四路八年河北置大名高陽關真定定州四路熙寧五年陝西又置熙河路此特為軍事而設每路設安撫使兼馬步軍都部署後避英宗諱改稱都管總其民事仍領於轉運司故不在十八路廿三路之數初陝

西祇有一轉運司及熙寧收熙河路乃分轉運司為二一治永興軍曰永興軍路鄜延環慶屬焉一治秦州曰秦鳳路秦鳳涇原熙河屬焉志於陝西路敘次五路沿革不甚了了讀史者益致茫昧矣

水經注難盡信

水經注載漢時侯國難以盡信如河水篇以臨羌為孫都封國不知孫都本封臨蔡其地在河內不在金城也以西平為公孫渾邪封國不知渾邪本封平曲其地在高城不在金城也汾水篇以河東之平陽為范明友封國不知明友本封平陵其地在武當不在河東也安成侯劉蒼在贛水篇以為長沙之安成在汝水篇以為汝南之安成桃侯劉襄在泂水篇

以爲酸棗之桃虛屬東郡在濁漳水篇以爲信都之桃縣建成侯劉拾在贛水篇以爲豫章之建成在淮水篇以爲沛之建成皆彼此重複不相檢照又淮水篇云山陽城卽射陽縣故城也漢世祖建武十五年封子荆爲山陽公治此攷山陽僑治射陽乃在東晉安帝之世漢之山陽郡自治昌邑今金鄉縣境以典午之僑治當東漢之故封豈其然乎

河水篇河水又東北逕陽阿縣故城西漢高帝六年封郎中萬訢爲侯國沁水篇陽泉水東逕陽陵城南陽阿縣之故城也漢高帝七年封卞訢爲侯國此二條人名與年數小異亦重複而舛誤也史漢表但有陽河齊侯其石此云陽阿可證

二表之譌漢志平原鄉有阿陽縣上黨郡有陽阿縣與鄆

見本不同而萬訢卞訢其石三名互異未審誰是史記功臣侯表百年

之間見侯五正義以楊阿侯卞仁當見侯之一是正義本作卞與鄆所見本同

澠水篇蒲水逕夏屋故城世謂之寡婦城賈復從光武追銅馬五幡於北平所作也世俗音轉故有是名矣又汝水篇桓水逕賈復城北復南擊鄆所築也俗語譌謬謂之寡婦城水曰寡婦水此兩寡婦城皆云賈復之譌必有一誤矣予謂夏之言假也陳郡陽夏縣夏讀如賈賈寡聲相近北音讀屋如烏與婦音亦相似則夏屋之爲寡婦不必因於賈復也

廣韻載唐州名

廣韻所載州名平聲八十九曰同忠通蓬松容瀧媯隋岐儀
伊綏夔蘄歸舒渠徐廬滁渝扶鄜蒲瀘齊西懷開萊申陳秦
岷豳均文汾忻原丹安檀蘭燕延豪曹河和瓜巴沙揚洋梁
涼商房坊襄芳唐當滄黃光杭平荆瀛營成沼并青邢庭靈
寧興登恆幽金嵐甘鹽上聲十五曰隴汝許楚武濟海鄆沔
兗趙夏穎壽陝去聲二十九曰鳳宋雍絳遂利冀渭魏豫潞
薊衛貝會代鄆萬建汴華相宥慶鄭定勝鄧沁入聲二十二
曰濮復肅密蔚滑莫亳博廓澤號易石壁翼德隰集合壘峽
皆唐開元以前之疆域蓋承唐韻舊文孫愐序所謂輿地志
及武德已來并置迄開元三十年竝列注中者是也每州敘

述沿革甚備惟容遂建三州但云州名不敘沿革則宋景德
刊修時刪去之矣唐所置州尚多乃江南嶺南諸路州名全
闕兩浙惟載杭州皆宋人妄刪非孫氏之舊也伊涼甘瓜曼
宥庭鄆燕蘄媯平久不在宋版圖之內山南之通州宋初改
名達州矣此云通州本漢宕渠縣則是唐之通州非宋之通
州知實係孫愐舊文宋人刪改有未盡耳

平州

漢書王莽傳民棄城郭流亡爲盜賊并州平州尤甚胡三省
注通鑑謂此時未有平州疑爲字誤予攷路博德傳云西河
平州人平州縣名屬西河郡正在并州部內故有并州平州

之稱地理志無平州而有平周周州古字通用非有遺漏也
胡氏疑爲遼東之平州故云此時未有平州不知并州本有
平州縣也

薛

漢時魯國有薛縣司馬彪郡國志薛本國張守節史記正義
云薛故城在今徐州滕縣南四十四里而菑川國亦有薛縣
史記平津侯列傳稱齊菑川薛縣人漢書亦云菑川薛人是
也或據班氏地理志菑川無薛縣疑本傳有誤是大不然本
傳明云菑川國人推舉與魯國無預菑川本齊地故汲黯以
齊人多詐譏之也漢初菑川與魯俱有薛縣而菑川之薛不

見于班志志所載者元成以後之版籍武帝時此縣猶未併
省也

春秋時魯有薛邑莊公卅一年築臺于薛此別是一地非任
姓之薛國

盱眙

漢書地理志臨淮郡有盱眙縣應劭曰音吁怡史記或作盱
台裴駟引鄭元說音煦怡廣韻十虞部盱字下注云盱眙縣
在楚州盱眙字皆从目無可疑也類篇於目部眙字下云盱
眙地名是矣乃於肉部別出盱字云盱眙縣名此所謂北人
不識盱眙者歟

牟婁

春秋莒人伐杞取牟婁于欽曰安邱南有牟婁山俗譌作朦
隴山卽其地蓋牟婁朦隴聲相近也

通州

王淋野客叢書云唐時揚州爲盛通州爲惡引白樂天詩曰
通州海內恹惶地司馬人閒冗長官元微之詩曰折君災難
是通州又曰黃泉便是通州郡其不美如此勉夫蓋誤以微
之所謫之通州卽淮南之通州揚通同在一道而相去霄壤
是可怪耳予謂唐之通州隸山南道卽今達州宋乾德三年
更名若淮南之通州本揚州海陵縣其置州乃在五代之世

元和間未有此州也

大名府

宋大名府領縣十三今大名府領一州六縣唯元城附郭及
南樂一縣沿宋之舊其餘無同者成安屬廣平府內黃屬河
南之彰德府莘館陶清平冠氏今無氏字屬山東之東昌府臨清
山東直隸州以夏津爲屬縣朝城屬山東之曹州府宗城金
改屬洺州元志無此縣則金季已廢矣魏縣 國朝裁併入
大名縣今大名府所領之開州及清豐長垣卽宋之澶州也
東明則宋曹州之冤句縣也宋東明縣屬開封府今爲儀封蘭陽二縣

泉州

泉州之名雖同而有隋唐之異隋志云隋平陳改豐州曰泉州後改閩州又改福州此隋之泉州也又唐志云析泉州之南安莆田龍溪置武榮州治南安後治晉江武榮州尋廢縣還隸泉州又復置武榮州更武榮州為泉州唐志在景雲二年通典以為神龍以後初置泉州不同此唐之泉州也今為泉州自此泉之與福始定分為二郡不相溷矣故景雲二年已前凡曰泉州者指今福州也景雲二年之後凡曰泉州者指今泉州也輿地紀勝

新豐

丹徒縣有新豐鎮陸游入蜀記六月十六日早發雲陽過夾岡過新豐小憩李太白詩云南國新豐酒東山小妓歌又唐

人詩云再入新豐市猶聞舊酒香皆謂此非長安之新豐也然長安之新豐亦有名酒見王摩詰詩

石城

後漢書方術傳高獲遠遁江南卒於石城石城人思之其為立祠章懷注石城在今蘇州西南大昕案蘇州無石城據郡國志丹陽郡有石城縣當是高獲所遁也

虎嘯城

顧氏方輿紀要四川廣安州北十里有虎嘯城建置未詳按元史楊大淵傳中統三年復於渠江濱築虎嘯城以遁宋大良城宋高祖三年移廣安軍於大良平寶祐六年入楊文安

傳中統四年進築虎嘯城以困大良趙匣刺傳中統三年守東川四年宋夏貴以兵侵虎嘯山寨元帥欽察遣匣刺率兵往禦之貴敗走追至新明縣新明縣宋屬廣安軍故城在岳池縣南二十里縣在廣安州西六十里西南至合州定遠縣百卅里斬首三十餘級至元五年成東安虎嘯山兩城宋楊立以兵護糧送大良平匣刺率所部兵與立戰於三重山立敗走是虎嘯山爲宋元交爭之地其築城始末歷歷可攷顧氏以爲建置未詳蓋未檢元史耳顧氏所載宋金元地名大約本諸薛方山通鑑而未讀全史如三重山東安城之名皆缺而不書

蜀四帥府

元憲宗八年卽宋寶祐六年也宋大獲山守將楊大淵時宋以大獲山爲閬州治運山守將張大悅宋以運山爲蓬州治大良平守將蒲元圭宋以大良平爲廣安軍治皆以城降元元卽授以元帥使守之青居山軍人亦殺其守將出降宋以青居爲順慶府治明年遣便宜都總帥汪惟正戍青居與大獲運山大良平稱四帥府

水洛城

宋慶歷所築水洛城屬秦鳳路今甘肅靜寧州西南有水洛城元豐所築永樂城屬鄜延路今陝西米脂縣西南永樂城兩城皆與西夏交爭之地而相距遼遠名目不同今涑水記聞皆作永洛是誤初爲一地矣溫公畱心經濟且係目睹耳聞之事不應舛譌乃爾當是

校書之人不諳地理輒有改易非溫公元本也幸輔編年錄亦以冰洛作

洛永

光化

宋京西路有兩光化縣其一屬隨州本蕭齊所置安化縣隋唐皆為光化縣而宋初因之熙寧元年省入隨縣今隨州東有光化廢縣即熙寧所廢之縣也其一屬襄陽府本宜城縣之陰城鎮宜城九域志作穀城按志兩縣皆屬襄陽府而穀九域志作穀城是也乾德三年置乾德縣為光化軍治熙寧五年廢軍改乾德為光化縣隸襄陽其後復為光化軍今襄陽府光化縣即其地也兩縣一省一置俱在熙寧開宋史地理

志記載分明或者仍為一地轉訾史志有誤是不然矣王象

隨州有廢光化縣非襄陽之光化也

沌口

由武昌至江陵水行當派大江別有沌口者亦水道可避江行之險沌讀如篆夏秋水漲可行過九月則沌涸不可行必由巴陵至荆渚矣陸氏入蜀記八月三十日離鄂州沿鸚鵡洲南行過謝家磯金雞洲泊通濟口九月一日始入沌實江中小夾也過新潭有龍祠自是無復居人兩岸葭葦彌望謂之百里荒二日至下郡始復有挽路登舟背望竟陵遠山泊白曰三日過八疊洲口泊歸子保四日過綱步泊畢家池蓋

屬復州玉沙縣滄浪鄉云五日泊紫湄六日過東場泊鷄鳴
七日至湛江八日至江陵之建寧鎮蓋沌口也晉王澄棄荆
州別駕郭舒不肯從澄東下乃留屯沌口陳侯安都討王琳
至沌口皆此地也自是泛江入石首縣界過公安至沙市距荆
州陸行
十里

李晏口

通鑑周顯德二年正月詔浚胡盧河築城於李晏口注冀州
脩縣東北有李晏鎮時築城屯軍以爲靜安軍按薛史其軍
南距冀州百里北距深州三十里夾胡盧河爲界大昕案舊
五代史是年三月以李晏口爲靜安軍與胡注合但注云其

軍南距冀州百里則是在冀州之北脩縣又在冀州東北一
百五十里則不得以脩縣之李晏鎮當之矣攷一統志李晏
鎮在景州東北當胡盧河南岸此爲東李晏口又有西李晏
口在今深州南皆五代時置軍屯守處是則李晏本有東西
兩口而周所置之靜安軍則在深州不在脩縣胡氏殆混而
一之矣沈存中筆談云深州舊治靖安其地讎鹵景德中議
遷時傅潛家在李晏乃奏請遷州于李晏今深州是也此說
亦不然深州本治陸澤後周置靜安軍於李晏口在州南卅
里洎宋雍熙二年靜安軍廢四年移州治李晏因故軍名爲
靜安縣省陸澤下博二縣入焉此深州改治之見於九域志

者沈誤以為景德中又謂州舊治靖安皆攷之未審也

九域志冀

州舊縣有李晏鎮此東李晏鎮

平水

金史地理志平陽府平陽縣有平水金時有毛麾者平陽人自號平水老人見趙與峕賓退錄金元之世平陽立經籍所一時書坊印板咸集於此今世所傳政和證類本草即平陽張存惠所刊也

張湙會稽續志平水市在會稽縣東二十五里元微之序白氏長慶集云予嘗於平水市中見邨校諸童競習詩召而問之皆對曰先生教我樂天微之詩固亦不知予之為微之也

自注平水鏡湖旁艸市名此又一平水也

秀水

朱勝非有秀水閒居錄三卷陳振孫云寓居宜春時作秀水者袁江水名也非秀州之秀水縣

青海

青海之名昉於後魏水經注河水篇云湟水又東南流逕龍夷城故西零之地也十三州志曰城在臨羌新縣西三百一十里王莽納西零之獻以為西海郡治此城湟水又東南逕卑禾羌海北有鹽池關駟曰縣西有卑禾羌海者也世謂之青海東去西平二百五十里按古人讀西如先酈所云西零

卽漢書之先零元始四年王莽誘塞外羌獻鮮水海允谷鹽池置西海郡先鮮音相似鮮水者先零水鮮水海卽今青海矣晉隆安二年後涼楊軌降於禿髮烏孤尋爲羌酋梁飢所敗西奔僭海襲乙弗鮮卑而據其地僭卽零之俗體亦以先零得名也西魏初涼州刺史史寧與突厥分道襲吐谷渾還會於青海隋開皇初遣元諧等襲吐谷渾敗之於青海隋書青海在吐谷渾中周回千餘里自唐以來青海之名著遂無有稱鮮水海者矣

避諱改郡縣名

漢文帝名恆改恆山郡曰常山光武叔父趙王名良改壽良縣曰壽張殤帝名隆改隆慮縣曰林慮

吳大帝孫權立子和爲太子改禾興縣曰嘉興景帝孫休立避諱改休陽縣曰海寧

晉武帝父名昭改張掖之昭武縣曰臨澤建安之昭武曰邵武邵陵之昭陽縣曰邵陽愍帝名業改建業縣曰建康鄴縣曰臨漳簡文帝名昱改育陽縣曰云陽成帝杜皇后名陵改陵陽縣曰廣陽簡文鄭太后名春改富春縣曰富陽平春縣曰平陽蘄春縣曰蘄陽春穀縣曰陽穀宜春縣曰宜陽東海王越世子名毗改毗陵郡曰晉陵郡縣曰晉陵縣桓溫父名夔改平夷郡曰平蠻夷縣曰扶縣夷道縣曰西道

後魏道武帝名珪改上邽縣曰上封獻武帝諱宏改宏農郡曰恆農

齊文宣立子殷為太子改殷州曰趙州

隋文帝父名忠改中牟縣曰內牟雲中縣曰雲內中鄉縣曰真鄉煬帝名廣改廣州曰番州廣潤縣曰靈武廣威縣曰化隆廣恩縣曰洮河廣化縣曰河池廣長縣曰修城廣陽縣曰汶山廣年縣曰左封廣都縣曰雙流廣漢縣曰雒廣定縣曰蒲江廣通縣曰通義南廣縣曰南溪廣武縣曰滎澤廣寧縣曰汝北廣福縣曰安福廣川縣曰長河廣宗縣曰宗城廣平縣曰永年廣阿縣曰象城廣城縣曰樂壽廣昌縣曰飛狐

易州

長廣縣曰膠水廣饒縣曰東海廣牧縣曰安興廣昌縣曰襄

陽昌州廣澤縣曰連山

唐高祖名淵改長淵縣曰長水澶淵縣曰澶水太宗名世民改萬世縣曰萬歲富世縣曰富義興勢縣曰興道明皇名隆基改隆州曰閬州箕州曰儀州隆化縣曰賓化盈隆縣曰盈川唐隆縣曰唐安隆山縣曰彭山昌隆縣曰昌明隆康縣曰普康隆平縣曰太平隆安縣曰崇安隆龕縣曰崇龕基城縣曰祐川代宗名預改豫州曰蔡州宿預縣曰宿遷樂預縣曰樂山豫章縣曰鍾陵豫寧縣曰武寧德宗名适改括州曰處州括蒼縣曰麗水憲宗名純改純化縣曰慕化純義縣曰正

義又改涪州曰蠻州還涪縣曰青溪涪風縣曰從化穆宗名
恆改恆州曰鎮州恆陽縣曰曲陽武德初避太子建成名改
晉城縣曰晉安新城縣曰新政建城縣曰高安又唐高祖避
外祖獨孤信名改信州曰夔州神龍初避孝敬皇帝諱改宏
農縣曰恆農宏靜縣曰安靜垂拱初避武氏家諱改華州曰
大州華陰縣曰仙掌華原縣曰永安華容縣曰容城江華縣
曰雲溪華亭縣曰亭川

後梁朱全忠祖名誠改棗城縣曰棗平欒城縣曰欒氏阜城
縣曰漢阜臨城縣曰房子潞城縣曰潞子黎城縣曰黎亭告
成縣曰陽邑襄城縣曰苞苴韓城縣曰韓原舊唐書作元誤翼城縣

曰澮川鄆城縣曰萬安文城縣曰屈邑晉城縣曰高都陽城
縣曰濩澤應城縣曰應陽豐城縣曰吳高朝城縣曰武陽宗
城縣曰廣宗聊城縣曰聊邑成安縣曰斥邱父名信改信都

縣曰堯都皆唐天祐中敕改

後唐莊宗祖名國昌改博昌縣曰博興昌陽縣曰萊陽孝昌
縣曰孝感義昌縣曰柳義平昌縣曰德平昌樂縣曰南樂
後晉高祖名敬瑭改竟陵曰景陵

宋太祖之祖名敬改敬州為梅州石鏡縣曰石照父名宏殷
改宏農縣曰常農本日恆農史家避眞宗諱改殷城縣曰商城潑水縣曰
商水太祖名匡引改匡城縣曰鶴邱即今長垣引山縣曰平蜀太

宗名光義改義陽軍曰信陽義武軍曰定武昭義軍曰昭德
崇義軍曰崇信保義軍曰保平感義軍曰感德彰義軍曰彰
化南義州曰南儀孝義縣曰中陽義州縣曰宜川義興縣曰
宜興義章縣曰宜章郴義縣曰桂陽通義縣曰眉山方義縣
曰小溪義賓縣曰宜賓義寧縣曰信安安全義縣曰興安信義
縣曰信宜義倫縣曰宜倫義清縣曰中廬歸義縣曰歸信豐
義縣曰彭陽招義縣曰招信正義縣曰蒙山富義監曰富順
仁宗名禎改禎州曰惠州永貞縣曰永昌瀆陽縣曰眞陽瀆
昌縣曰保昌神宗名頊改旭川縣曰榮德孝宗名昚改慎縣
曰梁縣理宗名昀改筠州曰瑞州大中祥符五年避聖祖諱

改元武縣曰中江朗州曰鼎州朗山縣曰確山朗池縣曰營
山天聖元年避章獻后父諱改淮南之通州爲崇州蜀之通
州爲達州通利軍曰安利通化縣曰金川大觀四年避孔子
諱改瑕邱縣曰瑕縣龔邱縣曰龔縣紹興十二年避金太祖
諱改岷州曰西和州廿八年避金太子光瑛名改光州爲蔣
州光山縣曰期思

金章宗名璟改景州曰觀州睿宗名宗堯改宗州曰瑞州宗
安縣曰瑞安衛紹王名允濟改濟陽縣曰清陽永濟縣曰豐
閏顯宗名允恭改其城縣曰河平龔縣曰寧陽武功縣曰武
亭

明成祖名棣改滄州之無棣曰慶雲樂安州之無棣曰海豐
神宗名翊鈞改鈞州曰禹州光宗名常洛改洛南縣曰雒南

漢地理志縣名相同

子弟晦之言漢縣名相同者每加東西南北上下以別之然
攷之地理志重出者正復不少如曲陽三見一屬九江一屬
東海一屬交趾作曲易師古曰古陽字建城三見一屬勃海一屬沛
國一屬豫章劇兩見一屬北海一屬甯川定陶兩見一屬濟
陰一屬定襄西平兩見一屬汝南一屬臨淮陽城兩見一屬
潁川一屬汝南侯國平昌兩見一屬平原侯國一屬琅琊成陽兩
見一屬濟陰一屬汝南侯國東安兩見一屬東海侯國一屬城陽

新陽兩見一屬汝南一屬東海侯國鍾武兩見一屬江夏侯國一

屬零陵成兩見一屬涿侯國一屬泰山新市兩見一屬鉅鹿侯國一

一屬中山建陽兩見一屬九江一屬東海侯國平安兩見一屬

千乘侯國一屬廣陵平城兩見一屬北海侯國一屬雁門阿陽兩

見一屬平原一屬天水臨胸兩見一屬東萊一屬齊郡莽俱改監

胸新都兩見一屬南陽侯國一屬廣漢昌陽兩見一屬東萊一

屬臨淮侯國安陵兩見一屬潁川一屬汝南高平兩見一屬臨

淮侯國一屬安定饒兩見一屬北海侯國一屬西河高陽兩見一

屬涿郡一屬琅邪侯國武城兩見一屬左馬翊一屬定襄定襄之武

城續志作成王莽改縣名桓就是當為成也廣平兩見一屬臨淮侯國一屬廣平陰

山兩見一屬西河一屬桂陽樂成兩見一屬南陽侯國一屬河
閒富平兩見一屬平原一屬北地成安兩見一屬陳畱一屬
潁川侯國復陽兩見一屬南陽侯國房侯國一屬清河音腹安定三見
一屬鉅鹿侯國一屬安定一屬交趾武陽兩見一屬東海侯國一
屬犍為鄭兩見一屬京兆一屬山陽侯國成鄉兩見一屬北海
一屬高密安陽兩見一屬汝南侯國一屬漢中陽樂兩見一屬
東萊侯國一屬遼西武都兩見一屬武都一屬五原歸德兩見
一屬汝南侯國一屬北地東陽兩見一屬臨淮一屬清河黃兩
見一屬山陽侯國一屬東萊安邱兩見一屬琅邪一屬北海開
陽兩見一屬東海一屬臨淮樂陵兩見一屬平原一屬臨淮

侯國安成兩見一屬汝南侯國一屬長沙西陽兩見一屬江夏一
屬山陽侯國安平兩見一屬涿一屬豫章侯國高成兩見一屬南
郡一屬勃海新昌兩見一屬涿侯國一屬遼東朝陽兩見一屬
南陽一屬濟南高陵兩見一屬琅邪侯國一屬左馮翊宜春兩
見一屬汝南侯國一屬豫章石城兩見一屬丹陽一屬右北斗
新成兩見一屬河南一屬北海侯國若沛郡之鄼音嗟本是鄼
字與南陽之鄼形聲自別也

後漢縣名相同

續漢郡國志縣名相同者平都一屬豫章郡侯國一屬巴郡安
城一屬汝南一屬長沙高平一屬山陽侯國一屬安定郡武都

一屬武都郡道 一屬五原郡潞 一屬上黨郡 一屬漁陽郡無
慮 一屬遼東郡 一屬遼東屬國安帝紀元初二年鮮卑圍無慮縣又攻扶犁營殺縣令注
無慮屬遼東郡扶犁縣名屬遼東屬國或疑遼東屬國之無慮即扶犁之譌 候城 一屬遼東郡 一屬元菟郡 曲陽 一屬下邳國侯 一屬交趾郡九江之曲陽加西字 漢昌 一屬中山國 一屬巴郡 穀城 一屬河南尹 一屬東郡 陰平 一屬東海郡 一屬廣漢屬國 都尉陰平道

唐縣名相同

新城	<small>涿 杭</small>	龍泉	<small>綏 處</small>	陽城	<small>河南 澤</small>
武寧	<small>洪 萬</small>	永興	<small>新 鄂</small>	長樂	<small>臨 福</small>
龍門	<small>河中 新</small>	永清	<small>幽 房</small>	壽昌	<small>沙 陸</small>

太平	<small>絳 宣</small>	石泉	<small>金 茂</small>	安居	<small>普 保</small>
臨川	<small>撫 振</small>	大同	<small>鎮北 龔</small>	正平	<small>絳 環</small>
南昌	<small>洪 白</small>	新昌	<small>涿 峯</small>	樂平	<small>太原 饒</small>
梁山	<small>萬 武 戡</small>				

宋縣名相同

洪氏容齋五筆云國朝之制州名或同則增一字以別之若河北有雄州恩州故廣東者增南字蜀有劍州故福建者亦增南字以至西和西安州亦然若縣邑則不問今河南靜江府鞏州皆有永寧縣饒州皆有安仁縣蔡英之真陽廬汝之梁光台之仙居臨安建昌之新城越筠之新昌婺蜀之

永康處吉之龍泉嚴池之建德渭秀之華亭信吉之永豐郴興國之永興衢嘉之龍游施臨江之清江洪萬之武寧福循之長樂郴連之桂陽福桂之永福是也予按洪氏所舉尙遺金綿之石泉滁汀之清流潭慶渭之安化鞏道之寧遠江寧之德化泰興化之興化荆邵武之建寧郴循之興寧平定之樂平臨安南寧之昌化汀寧化之寧化唯郴之興寧置於嘉定間洪氏所未及見此外難免挂漏之譏矣

元州縣名相同

保定成都皆有安州上都常州皆有宜興州淮安大名皆有清河保定般陽杭州建昌皆有新城建德池州皆有建德河

南吉安皆有永寧吉安信州皆有永豐松江平涼皆有華亭吉安處州皆有龍泉衢州嘉定皆有龍游福州靜江皆有永福衡州饒州皆有安仁安豐重慶威楚皆有定遠冀寧天臨皆有寧鄉奉元武昌皆有咸寧安豐融州皆有懷遠汝寧曲靖皆有羅山杭州南寧皆有昌化福州循州皆有長樂廬州汝州皆有梁縣興國郴州皆有永興龍興夔州皆有武寧贛州化州皆有石城贛州欽州皆有安遠紹興大同皆有山陰滄州棣州皆有無棣永樂初改滄州之無棣曰慶雲棣州之無棣曰海豐鞏昌道州皆有寧遠

明縣名相同

明縣名相同者如直隸山東江西浙江皆有新城直隸河南
江西皆有永寧南直隸陝西皆有華亭有山陽江西湖廣皆
有安仁順天湖廣廣東皆有東安直隸南直隸皆有清河山
西浙江皆有山陰山西江西皆有廣昌有樂平福建廣東皆
有長樂江西浙江貴州皆有龍泉陝西湖廣皆有咸寧南直
隸浙江皆有建德山西湖廣皆有寧鄉南直隸山西浙江四
川皆有太平南直隸四川雲南皆有定遠南直隸雲南皆有
太和陝西湖廣貴州皆有安化江西浙江皆有新昌河南廣
東皆有新安湖廣廣東皆有興寧江西福建皆有德化山東
廣東皆有海豐湖廣廣東皆有會同浙江廣東皆有昌化福
建廣西皆有永福南直隸廣西皆有懷遠南直隸湖廣皆有
桃源江西廣東皆有石城江西廣西皆有興安陝西四川皆
有石泉江西四川廣東皆有長寧江西四川皆有東鄉山西
四川皆有大寧陝西廣東皆有三水而陝西之延安鞏昌兩
府皆有安定江西之廣信吉安兩府皆有永豐則一省中且
有同名之縣矣

莫能改焉史記高帝紀書云姓劉氏此漢制之異於三代者
後人強作解事輒謂漢爲堯後本祁姓譏史公昧於姓氏之
別斯爲誕矣漢爲堯後之說始于向歆父子史公著書在武
帝之世當時本無此議卽云史公會見左氏書而劉夏劉卷
亦載春秋安知漢劉必爲祁姓而非姬姓乎且漢之諸帝不
聞自言祁姓公主下嫁初不云祁載筆之臣安得輕議國姓
宋儒好議論古人而不稽時代致有此失孟堅贊雖言漢出
堯後而篇首仍用史公舊文蓋三代以前姓與氏分漢魏以
後姓與氏合終漢之世未嘗自言姓祁此古人慎重祖宗不
輕附會之意宋徽宗改公主爲帝姬其議出於秦京京固不
學而後來議者乃謂趙本嬴姓當稱帝嬴其迂誕可笑如此
三王異世不相襲禮況遙遙華胄影響攀附徒供有識捧腹
爾三代以上男子未有系姓於名者漢武帝元鼎四年封姬
嘉爲周子南君此男子冠姓於名之始後代文人有姬昌姬
滿姬旦之稱皆因於此好古之士當引以爲戒近有得古戈
者其文云芊子之船文本是羊字或釋爲芊引左傳楚武王
授師子焉爲證誤矣

妣

古人讀似妣二字皆如已詩於穆不已孟仲子作於穆不似
是已似同音也禹母吞薏苳而生因姓妣氏賈侍中說已意

已實也意已卽蕙菅是已妣同音也春秋葬我小君定妣公羊作弋弋妣聲相近由於妣有以音詩美孟弋矣弋卽妣

并官

孔子娶并官氏今人以爲开官其誤蓋自明始按漢韓敕造禮器碑云并官聖妃在安樂里宋祥符中封鄆國夫人制詞亦作并官氏此二碑皆在曲阜孔廟予嘗至句容廟學見元至順元年加封號制石刻亦作并官又見宋板東家雜記元板孔庭廣記書并官字未有作开者自明人刊家語誤并爲开後來刊宋史者轉依誤本校改沿譌者三百餘年良可怪也

郤郤二姓相溷

郤姓出濟陰河南二望左傳晉有大夫郤獻子綺戟切在入聲二十郤姓出高平丑饑切在上下平兩字形聲俱別本無通用之理漢隸从谷旁字或變作彡故郤亦作郤後來刊晉書者併郤字亦改爲郤此大誤也郤說濟陰單父人與高平郤氏不同族陸魯望詩一段清光染郤郎此用郤說事當爲仄聲而黃伯思譏其誤讀又不然矣

廣韻述氏姓

古姓氏書今多失傳唯廣韻所采多唐以前書蓋取孫愐唐韻之舊徵引最爲該洽後人刪去其十之八九唯張士俊所

刊尙是元本然其中亦有紕繆如衛大夫免餘本公孫氏今
以免爲姓楚大夫涉其帑據左傳本云藍尹亶涉其帑不與
王舟謂藍尹亶以舟載其妻子而不肯與王耳乃以涉其爲
複姓可乎又夫部璿字云姓也晉有璿錢按晉書有錢璿吳
興人非姓璿也鐸部拓字引周書王秉王興並賜姓拓王氏
按周書有王盟賜姓拓王氏未見王秉王興賜姓也以賁育
爲一人則王深寧已譏之

家譜不可信

顏師古云私譜之文出于閭巷家自爲說事非經典苟引先
賢妄相假托無所取信寧足據乎

漢書睦孟傳注

其注蕭望之傳云

近代譜牒妄相託附乃云望之蕭何之後追次昭穆流俗學
者共祖述焉但鄼侯漢室宗臣功高位重子孫嗣緒具詳表
傳長倩鉅儒達學名節竝隆博覽古今能言其祖市朝未變
年載非遙長老所傳耳目相接若其實承何後史傳寧得弗
詳漢書旣不敘論後人焉所取信不然之事斷可識矣蓋南
齊書本紀敘述先世以望之爲何六世孫譏其附會不可信
耳師古精于史學於私譜雜志不敢輕信識見非後人所及
唐書宰相世系表雖詳贍可喜然紀近事則有徵溯遠胄則
多舛由於信譜牒而無實事求是之識也

郡望

自魏晉以門第取士單寒之家屏棄不齒而士大夫始以郡望自矜唐宋重進士科士皆投牒就試無流品之分而唐世猶尚氏族奉勅第其甲乙勒爲成書五季之亂譜牒散失至宋而私譜盛行朝廷不復過而問焉士旣貴顯多寄居它鄉不知有郡望者蓋五六百年矣唯民間嫁娶名帖偶一用之言王必琅邪言李必隴西言張必清河言劉必彭城言周必汝南言顧必武陵言朱必沛國其所祖何人遷徙何自概置弗問此習俗之甚可笑者也

朱張顧陸號吳中四姓朱有沛國義陽吳郡河南四望而今人但稱沛國沛之顯者在漢爲朱浮今朱氏不皆祖浮也予謂三吳之朱當稱吳郡若徽文公之後則依文公自稱新安可也張有清河南陽吳郡安定熒煌武威范陽犍爲沛國梁國中山汲郡河內高平十四望而今人但稱清河子謂張之顯者多矣當視其所祖何人如季鷹思曼之裔則當云吳郡茂先道濟之裔當云范陽西平公軌之後當云安定平子之裔當云南陽不應概稱清河也廣韻顧姓出吳郡不聞有它望今顧氏所祖不曰雍曰榮則曰野王曰況皆吳人也而改稱武陵謬矣陸有吳郡河南二望河南之陸出自鮮卑本步陸孤氏魏孝文時改爲陸氏今陸氏皆宗績績遜抗則爲吳郡之陸審矣而轉有取于代北之陸何哉間有不稱河南而

稱平原者未審其故若以士衡爲平原內史而稱之則吾未聞以所歷之官爲郡望者也

今人姓金者多稱其望曰彭城此承吳越避諱改劉爲金姓改而族望未改如仁山之後稱彭城是爲當矣日磾本匈奴渾邪王子厥後封侯累世久居三輔不應冒彭城之望也廣韻汪姓汪芑氏之裔姓苑云新安人今汪氏皆祖越國公華華故籍新安乃不稱新安而平陽非也

杜康

說文古者少康初作箕帚秫酒少康杜康也葬長垣見巾部帝字下李善注文選初未之引

鴟夷子皮

淮南子汜論訓昔者齊簡公釋其國家之柄而專任大臣將相攝威擅勢私門成黨而公道不行故使陳成田常鴟夷子皮得成其難以鴟夷子皮爲田常之黨它書所未見按田常弑君之年越未滅吳范蠡何由入齊此淮南之誤也

養由基

論衡儒增篇養由基從軍射晉侯中其目按左氏傳養由基射呂錡中項未嘗射晉侯也呂錡射楚其王中目王充誤記不足信

刀父

荀子侘詩閭媼子奢莫之媒也媼母刀父是之喜也朱文公云刀父未詳竊疑卽齊之豎刁亦作貂刀有貂音後人別刁爲二字

季襄

淮南汜論訓季襄陳仲子立節抗行不入滂君之朝不食亂世之食遂餓而死高誘注季襄魯人孔子弟子朱錫鬯撰孔子弟子攷采摭羣書得九十八人以補史記家語之闕獨不及季襄何也

趙梁左強

史記龜策列傳桀有諛臣名曰趙梁紂有諛臣名曰左強淮

南覽冥訓紂爲無道左強在側高誘注左強紂之諛臣古今人表無趙左二人

莊彭祖

儒林傳春秋公羊有嚴彭祖顏安樂二家彭祖本莊氏史家避明帝諱追改公羊疏引六藝論云睦孟弟子莊彭祖及顏安樂

蔡伯偕

論衡別通篇扶風蔡伯偕鬱林太守張孟嘗東萊太守李季公之徒心自通明覽達古今故其敬通人也如見大賓此蔡伯偕未詳其名非陳留蔡邕也

漢人不見於史者

論衡案書篇東番鄒伯奇臨淮袁太伯袁文術會稽吳君高周長生之輩位雖不至公卿誠能知之囊橐文雅之英雄也觀伯奇之元思太伯之易章句文術之咸銘君高之越紐錄長生之洞歷劉子政楊子雲不能過也又對作篇引鄒伯奇檢論周長生名樹見謝承書北堂書鈔引之太平御覽引鄒子曰朱買臣孜孜修學不知雨之流麥伯奇豈即鄒子之字耶服虔注左傳引彭仲博說虞翻注易引蔡景君說皆漢人也

徐巡

說文有徐巡說案後漢書儒林傳濟南徐巡師事衛宏後從

杜受學亦以儒顯

張敞

說文引張敞說一條案漢人不當以武帝諱為名疑是張敞

朱建安

南史劉杳傳沈約云何承天纂文奇博其書載長頸王事此何所出杳曰長頸是毗騫王朱建安扶南以南記云古來至今不死案隋書經籍志有扶南異物志一卷朱應撰應當是建安名也

謝超宗

金樓子載謝超宗子今刊本子誤作字幾卿中拜率更令騶人姓謝

亦名超宗亦便自稱姓名云超宗蟲蟻就官乞賧幾卿既不
容酬此言騶人謂為不許而言之不已幾卿又走

王筠

梁有廣晉令王筠見南史陸襄傳與琅邪王元禮同時同姓

名

漢人同姓名

孫季昭示兒編記古人同姓名如漢兩韓信兩王吉兩王霸
唐兩李益兩韓翃之類然所舉多有未備今即班范二史言
之西京有兩王莽兩嚴延年兩趙堯兩貢禹兩王崇兩王立
兩劉惔兩蘇建兩京房兩劉歆兩陳咸一見後漢陳寵傳兩陳欽一見

後漢陳元傳一見後漢陳寵傳東京有兩杜喬一見杜林傳兩鄭眾兩王渙兩王

隆一見張輔傳兩王元一公孫述將兩陳元一見循吏傳兩馬成一見虞延

傳兩張超一在文苑兩陳紀一丹陽人兩趙典一見黨錮傳兩張

陵兩劉方一司空兼兩漢計之則有四王成一前漢循吏

一見逸民傳一見李固傳三王商一丞相兩張禹兩張猛一見張與

傳兩張敞一見竇武傳兩張武一見文帝紀兩張霸一見儒林傳兩

任安一見後漢儒林傳兩王嘉一在獨行傳若西京之兩杜子夏兩陳孟

公則又同時同姓字而非同名也後漢張堪南陽宛人嘗為

蜀郡太守而張衡傳云祖父堪蜀郡太守計其年代相去不

甚遠而衡亦南陽西鄂人雖縣名小異而郡望未改官職又

同是卽一人矣或疑別一張堪非是

異代同姓名

異代而姓名相同者難以悉數今就兩漢而下訖于宋元略舉記憶所及者書之如漢有張華晉亦有張華漢有賈逵魏亦有賈逵漢有王肅曹魏元魏皆有王肅漢有李廣魏亦有李廣見晉書文帝紀漢有黃忠見中屠蟠傳蜀亦有黃忠漢有王育說文晉亦有王育忠義傳漢有劉陶魏晉皆有劉陶漢有郭憲魏亦有郭憲字幼簡漢有張邈魏亦有張邈漢有王卓見順帝紀晉亦有王卓見王濟傳漢有孔安國晉亦有孔安國漢有劉琨論衡初稟篇卽劉琨也晉亦有劉琨漢有李嵩蘇不韋傳晉亦有李嵩漢有李充晉亦有

李充漢有謝安見滕撫傳晉亦有謝安漢有劉毅晉亦有劉毅漢有孟觀論衡起奇篇晉亦有孟觀漢有王商蜀亦有王商見秦漢紀有張陵魏亦有張陵魏志張範傳唐亦有張陵見唐詩紀事漢有王甫蜀亦有王甫漢有張昭見魏志張範傳吳亦有張昭漢有陳午晉亦有陳午見石勒載記漢有王暢晉亦有王暢見王濬傳漢有張衡晉亦有張衡見趙王倫傳隋亦有張衡漢有馬武晉亦有馬武見戴洋傳有馬融晉亦有馬融見陶黃傳漢有胡廣晉亦有胡廣見胡奮傳有徐幹見班超傳魏亦有徐幹晉亦有徐幹見王長文傳漢有張綱晉亦有張綱漢有江革南齊亦有江革漢有董仲舒梁亦有董仲舒漢有朱買臣梁亦有朱買臣漢有李膺梁亦有李膺漢有

王琳見趙傳梁亦有王琳漢有樊毅陳亦有樊毅漢有劉向北

齊亦有劉向見文宣帝紀漢有李善唐亦有李善漢有李延壽即繁

延壽唐亦有李延壽漢有李郃唐亦有李郃見藝文志漢有王逸唐

亦有王逸見宰相世系表漢有李封見儒林傳唐亦有李封見杜子美詩漢有

周興見周榮傳唐亦有周興漢有李益見李膺傳唐亦有李益漢有劉

平宋亦有劉平漢有朱震宋亦有朱震漢有楊震宋亦有楊

震漢有張俊宋亦有張俊漢有劉豫見第五倫傳宋亦有劉豫漢

有張林見鄭巨君傳宋亦有張林漢有趙禹宋亦有趙禹徐州推官見東

坡集陳公弼傳魏有張融南齊亦有張融魏有王修晉亦有王修魏

有王基晉亦有王基見王敦傳蜀有兩劉巴一有傳一見李嚴傳注晉亦有

劉巴見石勒載記蜀有李嚴晉亦有李嚴見趙主倫傳蜀有李福唐亦

有李福宋亦有李福仁宗朝武臣見長編蜀有張裕劉宋亦有張裕吳

有徐陵陳亦有徐陵吳有嚴武唐亦有嚴武吳有桓彝晉亦

有桓彝晉有袁粲宋亦有袁粲晉有賀循陳亦有賀循晉有

劉穆之唐亦有劉穆之見寶刻類編晉有王戎唐亦有王戎見林士宏

傳晉有王恭唐亦有王恭見儒學傳晉有王珣唐亦有王珣見宰相世

表晉有王旦見石勒載記宋亦有王旦晉有吳曾見周延傳宋亦有吳

曾見藝文志晉有葛洪宋亦有葛洪晉有王濬宋亦有王濬見王安石

詩苻秦有王猛陳亦有王猛劉宋有蔡興宗趙宋亦有蔡興

宗編注杜詩南齊有王儉唐亦有王儉見宰相世系表北魏有崔鴻唐亦

有崔鴻貝州刺史見白居易制唐有李沆見宰相世系表宋亦有李沆唐有張

齊賢見儒學傳宋亦有張齊賢唐有韓琦見宰相世系表宋亦有韓琦唐

有王曾著作郎見金石錄宋亦有王曾唐有李石宋亦有李石字知幾見

二百名家名賢文粹金亦有李石唐有王珪宋元皆有王珪元王珪見孝友傳

唐有張錫宋亦有張錫唐有李綱宋亦有李綱唐有蔡京宋

亦有蔡京唐有張說宋亦有張說唐有劉晏宋亦有劉晏見忠

義傳唐有蘇轍見宋史孝友姚宗明傳宋亦有蘇轍唐有高適宋亦有高

適知趙州見會稽志唐有郭京撰周易舉正宋亦有郭京唐有陳夷行宋

亦有陳夷行公輔子唐有李侗衡州刺史見廣川書跋宋亦有李侗唐有

鄭樵見藝文志宋亦有鄭樵唐有李若水見宰相世系表宋亦有李若水

唐有張公謹宋亦有張公謹政和中知龍岡縣唐有張行成宋亦有

張行成紹興中進士號觀物先生唐有王建五代亦有王建宋亦有王建

婺源進士唐有王泌宋亦有王泌東陽人撰朱子語後錄唐有王起宋亦有

王起文彥博幕客撰甘陵伐叛錄唐有王質文中子五世孫宋亦有王質唐有常

建宋亦有常建括蒼人知台常二州唐有李頎宋亦有李頎見東坡集善畫唐

有李珣宋亦有李珣景定二年省元唐有朱長文見唐詩紀事宋亦有朱

長文後唐有李鄴亳州刺史見北夢瑣言宋亦有李鄴紹興時人宋有崔立

循吏傳金亦有崔立宋有吳澄淮東提刑司檢法見理宗紀元亦有吳澄

晉人同姓名

史繩祖學齋佔畢言古今同姓名者多矣至晉尤甚如兩劉

毅兩周撫兩孫秀兩解系兩周訪兩王愷兩王渾兩王澄是也子攷晉書又有兩衛瓘一有傳一陳留人爲三都賦略解見文苑傳兩王沈一有傳一字彥伯見文苑傳兩李密一在孝友傳一健爲太守見惠帝紀兩張茂一襲涼州牧一吳郡太守見列女傳兩張駿一襲涼州牧一姚襄將見哀帝紀兩韓壽一見賈充傳一爲慕容皝司馬見載記兩王敦一有傳一益州牙門將見李特載記兩孫登一見隱逸傳一附見孫楚傳兩徐邈一有傳一見王彌傳及石勒載記兩王洽一爲丞相導子一見劉隗傳兩李矩一有傳一江州刺史見李充傳兩王祥一有傳一爲呂光僕射見郭麐傳兩劉邁一爲瑗

之祖一爲毅之弟兩裴頠一有傳一爲東海王越將見懷帝紀按周頊傳有淮南太守裴頠疑懷帝紀頠字乃頠之譌皆學齋所未及

晉書姓名互異

穆帝紀永和五年褚裒使部將王龕北伐褚裒傳作徐龕按元帝紀有太山太守徐龕爲石勒所執死已久矣當從紀祖約傳其時牽滕率眾出降成帝紀戴洋傳並作牽騰安帝紀隆安三年吳國內史桓謙義興太守魏隱並委官吳興太守謝邈永嘉太守司馬逸皆遇害孫恩傳桓謙作桓謹魏隱作魏僞隱僞聲相近司馬逸作謝逸南史孝義傳作司馬謝逸之當是恩傳誤謝瑗度傳有義興太守魏鄢又僞之異文

段匹磾傳從弟末杯劉琨盧諶傳作末波波杯聲相近也亦作末杯見邵續傳王浚傳亦作末杯

張元張元之

謝安傳符堅率眾次淮肥兄子元入問計安夷然無懼色答曰已別有旨既而寂然元不敢復言乃令張元重請其下即逆命駕出山墅親朋畢集方與元圍碁賭別墅事安所與賭墅者即兄子元也而張元竟無下落亦不知其爵里何許也列女謝道韞傳初同郡張元妹亦有才質適于顧氏元嘗稱之以敵道韞似即其人矣而同郡二字難曉道韞為王凝之妻不識張元者與謝同郡乎抑與王同郡乎謝元傳授左將

軍會稽內史時吳興太守晉寧侯張元之亦以才學顯自吏部尚書與元同年之郡而元之名亞于元時人稱為南北二元此與前兩傳之張元同時同姓同為謝幼度親舊唯名多一之字豈即一人而傳聞異詞乎元之在吳興撰山墟名樂史寰宇記屢引之

唐人同姓名

唐人同時同姓名如文藝傳所載兩李益兩韓翃其最著矣武后時幸臣有張昌宗而張昌齡之兄亦名昌宗見文藝傳冀州南宮人

王宰

王宰武宗朝節度使附其父智興傳明皇時又有善畫王宰
杜子美詩所謂五日畫一水十日畫一石者也

李淳風父名播作天象賦見唐志此唐初人也又元和閒詩
人李播起家進士官郎中蘄州刺史見唐詩紀事

盧貞

盧貞字子蒙會昌五年為河南尹曰樂天九老會貞年未七
十亦預焉時又有內供奉盧貞見唐詩紀事

李翱

李翱字習之唐書有傳唐詩紀事云鄭州嘗掘地得刺史李

翱戲贈詩此自一李翱非習之也唐書習之傳亦不記為鄭
州王深甫編次習之集乃收入此詩

呂太一

唐有兩呂太一魏知古傳所薦洹水令呂太一後有聞於時
又韋倫傳宦者呂太一反嶺南此別是一人杜子美詩自平
宮中呂太一即韋倫傳之太一

陳子昂

陳子昂字伯玉仕武后時唐書有傳又大歷中有畫人陳子
昂見段成式京洛寺塔記

李若水

唐宗室世系表有兩李若水一淄川郡王孝同之曾孫一太宗五世孫

王維王縉

唐太原王維王縉兄弟一爲右丞一爲宰相而琅邪王方則之孫維與縉亦兄弟也又王智興之父亦名縉

王定保

唐摭言十五卷題云光化進士琅邪王定保撰書中稱王方慶爲七世伯祖今檢唐書宰相世系表琅邪王氏未有名定保者唯太原王氏有定保字翊聖乃起之曾孫蕘之子今書中於起直書其姓名於蕘字亦不同避則別是一人非太原

之定保矣唐有兩王定保而史僅載其一此表之脫漏也其書有云從翁丞相溥攷昭宗時宰相有王搏字昭逸出自琅邪有王溥字德潤出自太原定保旣出琅邪則溥當爲搏之謚但依表所列搏爲方慶八世孫而定保稱方慶七世伯祖則於搏不當有從翁之稱是亦可疑也

韋應物

韋應物貞元二年由左司郎中出爲蘇州刺史而劉禹錫集中有大和六年除蘇州舉韋應物自代狀宋葉少蘊胡元任已疑其非一人而沈作喆撰韋傳合而一之篇末雖亦有疑詞而終未敢決近世陳少章景雲據白樂天於元和中謫江

州後貽書元微之於文盛稱韋蘇州詩又言當蘇州在時人亦未甚愛重必待身後人始貴之則是時蘇州已歿而劉狀又在此書十年以後則其所舉必別是一人矣樂天守蘇日夢得以詩酬之云蘇州刺史例能詩西掖今來替左司言白之詩名足繼左司耳非謂實代其任也沈傳謂貞元二年補外得蘇州刺史久之白居易自中書舍人出守吳門應物罷郡寓郡之永定佛寺則誤甚矣白公出守在長慶間距貞元初垂四十年豈有與韋交代之理乎

大昕案樂天刺蘇州在寶歷元年陳以爲在長

慶間亦誤

劉脊虛

殷璠河岳英靈集錄劉脊虛詩謂頃東南高唱者十數人然聲律婉然無出其右惜其不永天年隕碎國寶脊虛未詳何許人意其爲南士也李華三賢論謂劉脊虛名儒史官之家兄弟以學著五說條貫源流備古今之變在京嘗疾太尉房公臨扶風聞之曰挺卿日若不起無復有神道殷直清有識尙恨言理少對常想見其面後避地逝於安慶

當作康安康郡卽金州也

唐書劉迅傳作康

此脊虛卽劉知幾之子迅唐書附知幾傳不言其

能詩或初爲一人似不然孟浩然有九日於龍沙寄劉大脊虛詩而新舊書敘知幾六子迅次在五是行第不同也王昌齡有送劉脊虛歸取宏詞解詩而唐史不言登宏詞科是出

身不同也一工於詩一善著書是趣向不同也兩劉生雖同時並有才不遇而一名一號似同實異恐難溷而一之

宋人同姓名

曹輔一南劍州人字載德有傳一海陵人字子方與蘇子瞻唱和

王存一字正仲丹陽人有傳一紹興中神勇軍統制見繫年

錄

吳革一開封人見忠義傳一九江人仕淳祐間嘗刻朱文公

周易本義一紹興初江西運副見繫年錄

王襄一鄧州人見孝義傳一南陽人靖康中西道都總管有

傳

劉通一并州人章獻皇后之父見外戚傳一紹興中知天長

軍見繫年錄

王淮一齊州人沔之弟一金華人字季海有傳

王著一單父人字成象有傳一成都人字知微翰林侍書附

呂文仲傳一紹興中通判溫州見繫年錄

王明一大名人字如誨有傳一承奉郎與金人戰死見繫年

錄一涪州將見元史世祖紀

王貴一并州人附楊業傳一岳飛部將

安守忠一晉陽人贈太尉有傳一捧日左廂都指揮使欽州

團練使見長編

李維一涪州人沆之弟一昭武人綱之弟

李若谷一徐州人字子淵有傳一若水之兄南渡參知政事

蘇紳一晉江人字儀甫有傳一紹興中江東兵馬都監

黃震一浦城人字伯起有傳一慈溪人字東發見儒林傳一

臨海人字子聞乾道進士知瑞安縣見赤城志又有琴師黃

震後改名振見四朝聞見錄

王珪一成都人字禹玉有傳一紹興中太常少卿見繫年錄

一開封人與任福死事附福傳

王琪一字君玉珪之從兄有傳一南渡武臣德之子

王鞏一字定國旦之孫附王素傳一紹興中知仁和縣一端

平丙申死蜀難見理宗紀

田敏一鄒平人見儒林傳一易州人真宗時武臣有傳

王雱一字元澤安石之子附安石傳一澤州人雲之弟官右

奉議郎見繫年錄

陳升之一熙寧宰相有傳一淳熙中保義郎

蔡抗一宋城人字子直附其弟挺傳一建安人字仲節元定

之孫有傳其名本是杭字史誤从手旁見長編

趙鼎一治平中侍御史嘗奉使契丹外國傳熙寧中提刑趙

鼎當卽一人一聞喜人字元鎮有傳

李浩一西河人東都武臣有傳一臨川人字德遠仕孝宗朝有傳

王質一大名人旦之兄子見涑水記聞一字景文興國人附

王阮傳

王彥昇一字光烈建隆功臣有傳一南渡閣門祇候見繫年

錄

王佐一山陰人字宣子紹興十八年狀元一紹興閒中軍第

四將見繫年錄一寶祐閒長寧守將見忠義傳

孫奕一廬陵人字季昭撰示兒編一元豐中都官員外郎陳

襄薦士三十三人之一也

楊朴一真宗朝隱士一資陽人紹興左宣教郎一黃巖人字

文之淳熙特科官承奉郎

史炤一眉山人字見可撰通鑑釋文者一潁昌人文彥博嘗

從受學嘉祐中提舉常平史炤熙寧四年前知襄州史炤言

開修古瀘河一百六里灌田六千六百餘頃當卽潁昌之史

炤也一咸淳中利路統制見度宗紀

王堯臣一應天府人字伯庸有傳一汾州人嗣宗之子

張觀一常州人有傳一絳州人字思正有傳

胡銓一廬陵人字邦衡有傳一婺源人字仲平政和二年進

士見新安志

張震一□□人有傳一歛人乾道五年進士見新安志

郭京一陳州人仁宗朝以布衣授大理評事一靖康時自言能用神兵者

劉藻一福州人字昭信紹興末祠部員外郎一嶺南人知梅州二人同時同姓名見周必大龍飛錄

張琬一韓城人樞密使昇之子崇寧間為轉運副使會稽志元符三年六月張琬以朝散大夫權發遣越州十二月移陝

西提點刑獄此韓城人一鄱陽人治平二年登第見施元之注蘇詩

李常一字公擇建昌人一登州人東坡為作遺直坊詩于欽

齊乘人物篇誤切兩人為一一度宗朝吏部侍郎

王安國一臨川人安石之弟一理宗朝守棗陽軍

張林一游奕軍統領見楊巨源傳寧宗紀嘉定二年沔州統制張林等謀作亂事覺貸死除名與巨源傳之張林未審即

一人否一京東安撫使本金降將一咸淳二年死難武臣見本紀一德祐池州都統制降元

張維一湖州人官衛尉寺丞子野之父齊東野語云卒於慶歷丙戌一熙寧中官臨涇縣令見長編又東坡南行集有次

韻答荆門張都官維見和惠泉詩似又是一人

李定揮塵前錄李定同時有三人其一字仲求洪州人晏元

獻之甥欲預賽神會蘇子美以其任子拒之致興大獄者又
李定字資深元豐中御史中丞揚州人又李定嘉祐治平以
來以風采聞徧歷諸路計度轉運使官制未行蓋濟南人也
世多指而爲一不可不辯宋史有傳者唯資深一人卽劾東
坡詩案者坡集有壽州李定少卿出餞城東龍潭上詩蓋濟
南人也

張承德一并州人有傳一幽州人暉之孫見暉傳一開封人
忠之子見忠傳

張昭遠一濮州人卽張昭也有傳一滄州人凝之子有傳

張燾一臨濮人字景元有傳一饒州人字子公南渡執政有

傳

王應麟一慶元人字伯厚有傳一晉江人知南海縣見石刻
與伯厚同時

李祥一無錫人字元德有傳一開封人見宦者傳

王杲一齊州人咸平五年卒有傳一京兆人朔州防禦使雍

熙四年卒見太宗實錄此兩人同姓名又同時

張廷翰一澤州人侍衛馬步軍都虞候一冀州人團練使兩
人皆仕太祖朝皆有傳

王延德一東明人有傳一大名人亦太宗晉邸舊人附見延
德傳

徐自明一永嘉人字誠甫撰宰輔編年錄一金華人嘗知蘇州之嘉定縣見練川圖經

陳均一□□人字平甫撰九朝編年備要一永嘉人知平江府見吳郡志

楊萬里一廬陵人字廷秀有傳一錢塘人知嘉定縣見練川圖經

王倫一仁宗時虎翼軍以反逆誅見長編一大名人紹興奉使死於金國有傳

葉適一熙寧中光祿寺丞見涑水記聞一永嘉人字正則有傳

王化基一真定人真宗朝參政有傳一元祐內臣入黨籍

張奎一臨濮人有傳一天聖中保章正見長編

章甫一字端叔浦城人熙寧三年進士都官郎中一字冠之鄱陽人自號易足居士張端義貴耳錄稱爲張冠之者也

何逢原一字希深與王十朋同時一字文瀾分水人咸淳間官中書舍人入元累徵不起

朱申一字繼宣江西人太學生一新安人淳祐十一年以朝散大夫知江州

李珏一嘉定十年江淮制置使一德祐朝臣

張順一成都馬步軍總管咸淳元年以死事贈卹見度宗紀

一襄陽民兵都統見忠義傳兩人同時

張忠一字聖昆開封人有傳一失其字亦開封人有傳

鄭湜一德安人見王介甫集一字溥之寧宗朝直學士院

王洙一字原叔有傳一字原父南渡人見攻媿集

王綯一字唐公南渡執政一字敏功安陽人紹興初知興國

軍樞密使炎之父也見周益公集

王古元祐黨籍碑有兩王古一字敏仲官戶部尚書文正公

旦之曾孫在曾任待制以上官一在餘官

黃裳一字冕仲延平人元豐狀元一字文叔劍門人南渡有

傳又有政和中福州知州黃裳見渭南文集恐別是一人非

元豐狀元也

黃定一字致一崇寧上舍第一乾道八年狀元

彭乘一為華陽人有傳一為高安人撰墨客揮犀

張體仁一紹興初左奉議郎江東宣撫司幕官見繫年錄一

卽詹體仁也宋史有傳而不著改姓

徐爽一建安人大中祥符五年狀元官至翰林學士一杭州

人賜號冲晦先生見夢梁錄

王炎一安陽人南渡樞密使有傳一字晦叔婺源人乾道五

年進士見新安志

呂好問一建炎執政有傳一理宗朝淮西總領兼江東運判

見景定建康志

陳造一字唐卿高郵人號江湖長翁一字周士吳興人直齋之子通判嘉興府

王汾一字彥祖禹偁孫官兵部侍郎見東坡集一金華人南渡師心子見王忠文公集

王達一濮陽人天禧三年進士官刑部郎中包拯集中有劾淮南轉運使疏當即其人也一淄州人當南宋時

崇寧二年十二月丁巳詔臣僚姓名有與姦黨人同者並令改名時改名者五人朱紱李積中王公彥江湖張鐸朱諤舊名紱改

名後官至執政

古人號相同明以後不錄

白樂天自號醉吟先生而皮日休郭祥正亦號醉吟先生樂

天又號迂叟而司馬溫公亦以自稱邵堯夫程正叔俱號伊

川先生黃伯思號雲林子而貢奎倪瓚俱號雲林邵博字公濟

節蔡元定真德秀俱號西山先生鄭伯英字景元永嘉人伯熊其兄也號

歸愚翁而葛立方亦號歸愚韓駒牟嘯俱號陵陽先生郭雍

許謙俱號白雲先生蘇元老蔡沈俱號九峯先生郭忠孝黃

裳俱號兼山先生胡宏李孝光俱號五峯王十朋史達祖俱

號梅谿洪邁徐子方俱號容齋王柏許衡俱號魯齋劉子翬

李之純俱號屏山呂南公計有功俱號灌園先生錢文子號

白石居士姜夔號白石道人楊繪元楊傑次皆號無爲子魏
揆之謝諤皆號良齋先生劉清之號靜春先生劉敞字季文
號靜春見四朝聞見錄元表易亦有靜春堂集林之奇王寂俱號拙
齋馮椅王應麟俱號厚齋王厚之趙彥肅俱號復齋張行成
號觀物先生祝泌亦號觀物老人陳去非翁應龍俱號簡齋
薛紹彭號清閼居士而倪瓚亦有清閼閣

古人姓名割裂

漢魏以降文尙駢儷詩嚴聲病所引用古人姓名任意割省
當時不以爲非如皇甫謐釋勸榮期以三樂感尼父庾信詩
唯有丘明恥無復榮期樂白樂天詩天教榮啟樂人恕接輿

狂謂榮啟期也費鳳別碑司馬慕蘭相南谷復白註謂蘭相
如也楊巨源詩不同蘧玉學知非謂蘧伯玉也朱君山墓誌
魚山本志門豹遺風謂西門豹也抱朴子外篇秦西以過厚
見親謂秦西巴也晉書孫惠傳竊慕墨翟申包之誠庾信詩
始知千載內無復有申包謂申包胥也庾信詩學異南宮敬
貧同北郭騷謂南宮敬叔也白樂天詩君看齊鼎中焦爛者
酈其謂酈食其也庾信銘年消張辟謂張辟疆也白樂天詩
宏恭陷蕭望謂蕭望之也李商隱詩梓潼不見馬相如謂司
馬相如也蜀志秦宓傳仲尼嚴平會聚眾書以成春秋指歸
之文謂嚴君平也皇甫謐釋勸鄭真躬耕以致譽謂鄭子真

也陸厥詩如姬寢臥內班婕坐同車謂班婕妤也陳師道詩
馬游從昔哀吾老謂馬少游也盧照鄰詩孫賓遙見待謂孫
賓碩也晉書王羲之傳論師宜懸帳之奇謂師宜官也劉孝
倬贈美人詩幸非使君問莫作秦羅辭謂秦羅敷也晉書王
濬傳世祖旌賢建葛亮之嗣謂諸葛亮也潘岳關中詩紛紜
齊万亦孔之醜謂齊万年也李商隱詩曾不問潘安又云潘
仁豈是才王瑤詩潘仁載果來謂潘安仁也杜子美詩顧愷
丹青重謂顧愷之也李邕東林寺碑殷堪摠衣而每談謂殷
仲堪也杜子美詩劉牢出外甥謂劉牢之也李商隱詩從事
人人庾杲蓮謂庾杲之也白樂天七德舞詩張謹哀聞人日
哭謂張公謹也韋嗣立授黃門侍郎制芝蘭並秀見謝石之
階庭騏驥並驅有劉山之昆季謂謝安石劉公山也褚載牋
曹興之圖畫雖精終慙誤筆謂曹不興也

十駕齋養新錄卷十二 終

經注皆不誤

儀禮疏單行本

儀禮疏五十卷亦黃蕘圃所藏自卷廿二至卷廿七皆闕每葉卅行行廿七字末卷有大宋景德元年校對同校都校諸臣姓名及宰相呂蒙正李沆參政王旦王欽若銜名真北宋板也唐人撰九經正義宋初邢昺撰論語孝經爾雅疏皆自為一書不與經注合并南宋初乃有併經注正義合刻者士子喜其便于誦習爭相放效其後又有併陸氏釋文附入經注之下者陸氏所定經文與正義本偶異則改竄釋文以合之而釋文亦失陸氏之舊矣予三十年來所見疏與注牘行

者唯儀禮爾雅兩經皆人世希有之物也

論語注疏正德本

論語注疏每葉廿行每行廿餘字首卷標題注疏下多解經
二字首葉板心有正德某年刊字但遇宋諱旁如圈識之疑
本元人翻宋板中有避諱不全之字識出令其補完耳若明
刻前代書籍則未見此式必是修補元板也

國語

國語傳於今者以宋明道二年槧本為最古錢曾讀書敏求
記舉周語昔我先王世后稷及左右皆免冑而下拜二條證
今本之漏是固然矣予於錢所舉之外復得六事周語瞽獻

曲注曲樂曲也今本曲皆作典高位實疾顛今本顛作僨子

僨蓋慎之諱古魯語笑吾子之大也今本大下有滿字古書

書慎與顛通齊語鹿皮四分注分散也今本分皆作介子

檀弓汰哉叔氏散作枚鄭語依皦歷華今本華作華吳語王孫維今

書亦作本雜作雄越絕書吳越春秋皆作王孫駱駝雜同音皆當以

明道本為正楚語王孫圉聘于晉今本圉作圍則未詳孰是

牟嚙申省乞祠狀深恐疾顛有辜隆使疾顛二字用國語

廣雅

釋訓管管浴也浴字未詳其義按詩靡聖管管傳云管管無
所依繫箋云管管然以心自恣蓋自恣之人不肖遵聖人法

度所為皆無所依傍毛鄭兩義本相承也浴當為恣之譌
釋言睽貫也按廣韻下平聲侵部睽費也貫當是費之譌
疊懷也懷或是惛之譌

醒長也王石臞謂醒與長義不相近予謂呈長聲相近
蓋黨也黨讀如儻蓋儻皆疑詞

脰饌也脰錯也此二脰字當為俎豆之豆或漢隸俎豆字有
从肉旁者

免隕也古兔免同文兔與妥聲相近易繫辭夫坤隕然示人
簡矣孟喜作退陸績董遇姚信俱作妥是免與隕退聲亦相
近也

子已似也已當卽十二支已午之已以音相近取義詩似續
妣祖鄭箋讀為已午之已鄭氏詩譜謂子思論詩於穆不已
孟仲子曰於穆不似

位莅祿也古文位與立同立祿聲相近
酌漱也酌當作酌

牒窳也窳當卽疏之異文

玉篇

玉篇玉部琰字引說文云玉爵也夏曰琰殷曰斝周曰爵又
人部倝字引說文云倝子也按說文無琰倝二字此所引者
徐鉉等新附注也予嘗謂今本玉篇不但非顧野王元本并

非孫強廣益之本以此二條證之益信
說文解字凡五百四十部玉篇刪併吳延教眉白與自黽歛
后六弦十部而別增父云臬宄處地磬索牀弋單丈十二部
其五百四十二部又說文書字在聿部今改爲部首而併畫
部入焉此部分之不合于說文者也

周成雜字

周成雜字一書元應一切經音義李善文選注屢引之攷隋
書經籍志小學類有雜字解詁四卷魏掖庭右丞周氏撰又
云梁有解文字七卷周成撰似周氏與周成非即一人唐
書藝文志有周成解文字七卷而無周氏書且兩志所載周

成書俱無雜字之名未知即此書否掖庭左右丞漢制皆宦
者爲之魏承漢制則周氏亦必宦者如注爾雅之李巡亦中
黃門也

龍龕手鑑

契丹僧行均龍龕手鑑四卷子所見者影宋鈔本前有燕臺
憫忠寺沙門智光字法炬序題云統和十五年丁酉七月卽
宋太宗至道三年也書中於完字闕末一筆知是南宋所鈔
晁氏馬氏載此書本名龍龕手鏡今改鏡爲鑑蓋宋人避唐
諱嫌字如石鏡縣改曰石照矣注中所引有舊藏新藏隨文
隨函江西隨函西川隨函諸名又引應法師音郭遂音或作
郭氏

琳法師說予攷之宋藝文志有可洪藏經音義隨函三十卷
未知其爲江西與西川也僧元應有一切經音義十五卷其
卽應法師乎

六書正譌

周伯琦六書正譌多采戴侗說以訾議許氏又妄增說文所
無之字如喬爲稼穡字器爲器皿字癸爲矢鏃字朐爲堅韌
字單爲舐觸之觸岯爲山嵐之嵐炎爲庭燎之燎掾爲式樣
之樣注本从壬而改从王堂本从止而改从牙印本从巴而
改爲二人相向敝敝皆从支而改从文妾本从辛而改从立
賣貴本兩字而妄合之屛从尸尸卽屋也而改从广甚至以
戊爲戈矛之戈庚爲鍾虞之虞誕謾巨信視同戲劇此六書
之異端而自稱正譌果誰正而誰譌乎

文場備用排字禮部韻注

此至正壬辰徐氏一山書堂刊本前有記一方云皇朝科試
舉子所將一禮韻耳然惟張禮部敬夫定本最善今復以諸
韻參校一韻爲增數字几增三千餘字釋焉而詳擇焉而精
敬用梓行爲文場寸晷之助云第一卷首題云文場備用排
字禮部韻注它卷皆題善本排字通併禮部韻略前後殊未
畫一前載科舉條例甚詳所列廟諱止於英宗而今上皇帝
不名似是泰定初刻後來翻本未及增添耳上下平聲各十

五上聲廿九去聲卅入聲十七與今韻同而每韻下與某同
用云云尙沿禮部舊式但未知張禮部何時人耳

萬斯同石經攷

石經一字三字之分紀載各殊趙明誠洪景伯諸人攷定以
一字者爲漢刻三字者爲魏刻既確不可易矣季野執後漢
書儒林傳序爲古文篆隸三體書法以相參校一語欲翻此
案謂蔚宗得于目睹必不誣甚矣季野之惑也蔚宗著書在
宋文帝之世其時洛陽已非宋土何由得石經而睹之若云
目睹在義熙永初之間則蔚宗未嘗官洛陽晉時膏梁公子
豈肯無故而跳身邊徼更無此情理矣衛恒晉初人其撰四

體書勢則云正始中立三字石經矣酈道元生長洛都其注
水經則云漢碑五經立于太學講堂前悉在東側碑上悉刻
蔡邕等名魏正始中又立古篆隸三字石經樹之堂西矣兩
人真目睹石經者並以三字爲魏正始刻則一字爲漢刻何
疑一字者別于三字言之漢人必無一字之目但言魏立三
字則漢刻祇有隸書不待言也靈帝紀蔡邕張馴李巡諸傳
俱不云有三體唯儒林傳序有之蓋蔚宗習聞太學有三體
石經誤切爲漢熹平所刻遂增此語後來又承蔚宗之誤不
能訂正季野以史學自負何亦憤憤若此

史記宋元本

予所見史記宋槧本吳門顧抱冲所藏澄江耿秉刊於廣德郡齋者紙墨最精善此淳熙辛丑官本也黃蕘圃所藏三山蔡夢弼刊本亦在淳熙間海寧吳槎客所藏元中統刊本計其時在南宋之季此三本皆有索隱而無正義明嘉靖四年莆田柯維熊校本金臺汪諒刻始合索隱正義爲一書前有費懋中序稱陝西翻宋本無正義江西白鹿本有正義是柯本出于白鹿本矣同時震澤王氏亦有翻宋本大約與柯本不異史記索隱正義皆各自爲書不與本書比附宋南渡後始有合索隱於史記者初自蜀本繼有桐川三山兩本皆在淳熙以前其時正義猶單行也白鹿本未審刻于何年以意揆之必在淳熙以後蓋以索隱爲主而正義輔之凡正義之文與索隱同者悉從刪汰自是正義無單行本而守節之元文不可攷矣

竹書紀年

晉書束皙傳稱竹書之異云益干天位啟殺之史通引竹書云益爲后啟所誅見疑古雜說等篇今本竹書云夏啟二年費侯伯益出就國六年伯益薨與束皙劉知幾所引全別然則今之竹書乃宋以後人僞託非晉時所得之本也

水經注引竹書紀年之文其於春秋時皆紀晉君之年三家分晉以後則紀魏君之年未有用周王年者蓋古者列國各

有史官紀年之體各用其國之年孔子修春秋亦用其法今俗本紀年改用周王之年分注晉魏於下此例起於紫陽綱目唐以前無此式也況在秦漢以上乎紀年出於魏晉固未可深信要必不如俗本之妄唯明代人空疏無學而好講書法乃有此等迂謬之識故愚以為是書必明人所葺宋鼂氏陳氏馬氏書目皆無此書知非宋人偽撰也

此書蓋采摭諸書所引繕湊成之如顯王十六年秦伐韓闕與惠成王使趙口破之注云不知是何年又三十一年秦蘇胡帥師伐鄭敗蘇胡于酸水注云不知是何年附此水經注所引無年又三十五年楚得吾帥師伐鄭圍綸氏注云不知何年附

此水經注引此條無年月赧王七年翟章救鄭次于南風注云此年未的此漢書臣瓚注所引無年月如係古本如此則紀年歷歷何云未的又云不知何年耶

裴駟史記集解於夏本紀引汲冢紀年云有王與無王用歲四百七十一年矣於殷本紀引汲冢紀年云湯滅夏以至於受二十九王用歲四百九十六年也此二條今本紀年俱在附注中相傳附注出於梁沈約而梁書南史約傳俱不言會注紀年隋經籍唐藝文志載紀年亦不言沈約有附注則流傳之說不足據也裴氏生於休文之前其注史記已引此文則此語不出於休文明矣裴氏不云紀年有注則此兩條者

實紀年正文未嘗別有注也

附注多采宋書符瑞志宋書約所撰故注亦托名休文作偽者

之用心如此

晉書束皙傳云紀年十三篇記夏以來至周幽王為犬戎所滅以晉事接之今本脫三家分仍述魏事至安釐王之二十晉字年據此知紀年實始夏后今本乃始於黃帝亦後人偽託之一證也

史記正義引括地志云故堯城在濮州鄆城縣東北十五里竹書云昔堯德衰為舜所囚也又有偃朱故城在縣西北十五里竹書云舜囚堯復偃塞丹朱使不與父相見也今竹書紀年乃宋以後人所撰故不取囚堯偃朱之說

十六國春秋

今世所傳十六國春秋凡兩本其一見於何鏗等所刊漢魏叢書僅十六卷寥寥數簡殆出後人依託其一明萬歷中嘉興屠喬孫項琳之所刊前有朱國祚序凡百卷蓋鈔撮晉書載記參以它書附合成之其實亦贗本也攷宋史藝文志崇文總目晁陳馬三家書目不載崔鴻十六國春秋則鴻書失傳已久龔穎運歷圖載前涼張寶以下皆改元晁氏謂不知所據或云出崔鴻十六國春秋鴻書久不傳于世莫得而攷焉是宋人已無見此書者明人好作偽書自具眼者觀之不直一哂耳又攷北史崔鴻傳鴻既為春秋百篇別作序例一

卷年表一卷今本無序例年表又鴻子子元奏稱亾考刊著
趙燕秦夏西涼乞伏西蜀等遺載爲之贊序褒貶評論今本
有敘事而無贊論此其罅漏之顯然者

吳越備史

吳越備史卷首題武勝軍節度掌書記范垌武勝軍節度巡
官林禹撰陳振孫謂錢儼所作託名林范宋史藝文志霸史
類載此書十五卷亦云錢儼撰託名范垌林禹撰又別有錢
儼備史遺事五卷世善堂書目作九卷今世所傳乃明錢德洪刻本前
五卷唐五代及宋開寶戊辰後一卷始開寶己巳訖端拱戊
子與史志卷數不合五卷之末題云大宋嘉祐元年丙申歲

正月七日朝奉郎守尚書刑部郎中集賢殿修撰知梓州軍
州事兼管內橋道使提舉戎瀘等七州賊盜甲兵專句當納
溪夷人公事上護軍賜紫金魚袋四代孫中孚寫攷程俱北
山小集中孚實中吳軍節度使元璟之曾孫於武肅爲四代
孫也錢岱序謂范林二記室撰備史五卷至十九世孫緒山
公命門人馬蓋臣補忠懿遺事合六卷刻之姑蘇今攷蓋臣
所撰唯吳越世家疑辨一卷德洪序中初不言補遺出其手
岱蓋攷之未審矣錢遵王記其家藏舊本止四卷又稱忠懿
爲今元帥吳越國王自乾祐戊申至端拱戊子終始歷然何
緣更有補遺顯係明人妄改惜不得遵王本一讀之

唐書直筆新例

唐書直筆新例一卷宋呂夏卿撰夏卿於仁宗朝預修唐書故作此例今以新書攷之殊不相應如書母書內禪書立皇太子書立皇后書命將征伐諸條按之本紀無一同者又謂僕固懷恩不當立傳宜見于鐵勒傳李白杜甫同傳不入文苑李適之當附恒山王傳今本皆不爾是夏卿雖有此議而歐宋兩公未之許也歐公本紀頗慕春秋褒貶之法而其病卽在此夏卿新例益復煩碎非體史家紀事唯在不虛美不隱惡據事直書是非自見若各出新意掉弄一兩字以爲褒貶是治絲而棼之也

薛氏宋元通鑑

薛方山宋元通鑑意在推崇道學而敘事多疏漏其年月率不可信如崇寧四年四月以綦崇禮權直學士院崇禮求便郡拜徽猷閣學士知漳州攷崇禮本傳云登重和元年上舍第而崇寧四年乃在重和前十有四年崇禮尙未登科安得遽登內翰乎崇禮由翰林出知漳州據李心傳繫年錄乃高宗建炎四年十月事而誤書於徽宗崇寧之年此甚可笑徽猷閣藏哲宗御集建於大觀二年在崇寧之後不得先有學士也

元祐二年書召陳師道爲祕書省正字適預郊祀云云遂以

寒疾卒按是年四月書以徐州布衣陳師道爲本州教授此見於長編可信者也其後改潁州教授時蘇軾爲知州則是元祐六年事矣魏衍撰彭城陳先生集記稱元符三年除棣州教授隨除正字歿于建中靖國元年十二月廿九日今繫之元祐二年其爲疏謬甚矣

唐律疏義

唐律疏義三十卷太尉揚州都督監修國史上柱國趙國公長孫無忌等撰永徽四年十一月十九日進其分門十二日名例曰衛禁曰職制曰戶婚曰廩庫曰擅興曰賊盜曰鬪訟曰詐僞曰雜律曰捕亡曰斷獄今所傳者元泰定四年江西

刊本每卷末附以王元亮釋文

唐高祖武德四年詔僕射裴寂等十五人撰律令大略以開皇爲準太宗卽位二年詔長孫無忌房元齡等復定律令議絞刑之屬五十皆免死而斷右趾其後蜀王府法曹參軍裴宏獻又駁律令不便者四十餘事遂除斷趾法爲加役流比古死刑殆除其半據有司定律五百條分爲十二卷此據文獻通攷二年上似當有貞觀字今攷疏義云加役流者舊是死刑武德年中改爲斷趾貞觀六年奉制改爲加役流是則改絞刑爲斷趾卽在太宗卽位之歲故猶稱武德也

魏李悝始造法經六篇曰盜法賊法囚法捕法雜法具法漢

丞相蕭何益以戶興廩三篇是爲九章之律魏明帝更定新律十八篇以刑名冠於律首又分立劫掠律詐律毀亡律告劾律繫訊律斷獄律請賊律興擅律留律警事律償贓律免坐律其盜賊囚捕雜戶猶仍舊名晉泰始四年頒新律因漢九章增刑名法例告劾繫訊斷獄請賊詐僞水火毀亡宮衛諸侯十一篇合二十篇梁武帝天監初頒律二十篇曰刑名法例盜劫賊叛詐僞受賂告劾討捕繫訊斷獄雜戶擅興毀亡衛宮水火倉庫廩關市違制北齊河清三年制齊律十二篇曰名例禁衛戶婚擅興違制詐欺鬪訟賊盜捕斷毀損廩牧雜律後周武帝改新律爲二十五篇曰刑名法制祀享朝

會婚姻戶禁水火興擅衛宮市鬪鬪競劫盜賊叛毀亡違制關津諸侯廩牧雜犯詐僞請求告言逃亡繫訊斷獄隋文帝開皇初定新律一名例二衛禁三職制四戶婚五廢庫六擅興七賊盜八鬪訟九詐僞十雜律十一捕亡十二斷獄此唐律所因也

史通

劉知幾沈潛諸史用功數十年及武后中宗之世三爲史官再入東觀思舉其職旣沮抑于監修又見嫉于同列議論鑿柄不克施行感憤作史通內外篇當時史局遵守者不過貞觀所修晉梁陳齊周隋六史之例故其書指斥尤多但以祖

宗敕撰之本輒加彈射又恐讒謗取禍遂於遷固已降肆意
舐排無所顧忌甚至疑古惑經誹議上聖陽爲狂易侮聖之
詞以掩詆毀先朝之迹恥異辭以諛今假大言以蔑古實諸
外篇竊取莊生盜跖之義後人大聲疾呼目爲名教罪人自
是百世公論要之蚍蜉撼樹言匪由衷柳翳隱形志在避禍
千載之下必有心知其意而莫逆者不然六經三史模楷万
世夫豈不知叔孫之毀無傷日月也哉然劉氏用功旣深遂
言立而不朽歐宋新唐往往采其緒論如受禪之詔策不書
代言之制誥不錄五行災變不言占驗諸臣籍貫不取舊望
有韻之贊全刪儷語之論都改宰相世系與志氏族何殊地

理述土貢與志土物不異叢亭之說一時雖未施行後代奉
爲科律誰謂著書無益哉

司馬溫公稽古錄

陳少章云溫公是書於古人姓名犯國諱者往往易以它字
如王匡作王輔石朗作石明敬翔作恭翔之類是也或二名
減一如尹元慶作尹慶張元遇作張遇崔元暉作崔暉張敬
達作張達錢宏佐作錢佐劉彥貞作劉彥之類是也或以字
易名如秦朗作秦元明謝元作謝幼度王殷作王允中之類
是也然其中如劉宏桓元徐圓朗許敬宗敬暉馬殷朱守殷
李匡威樂彥貞之類又直書不避而李敬元作李敬貞於聖

祖翼祖諱一避一否尤不可曉殆編纂匆遽或點竄未至耶
未卷書仁宗建儲事於英宗廟諱皆稱諱而卷中陳曙一人
凡三見恐出後人擅易非本文矣

鼂公邁歷代紀年

鼂公邁歷代紀年凡十卷有淳熙乙未七月鼂子綺後序及
紹興壬子季春包履常跋公邁字伯咎號傳密居士官右朝
散郎提舉廣東常平據子綺序稱族父下世後二十有四載
當紹興之辛巳予在廣州見公邁題名云紹興九年歲在己
未二月初吉當卽以其年卒距辛巳祇廿三載耳予所見係
南宋槧本闕第一卷以包跋證之蓋唐虞三代至兩漢也子

綺字仲皓

胡五峯皇王大紀

太史公書述五帝本紀始于黃帝班固古今人表律歷志依
易繫詞首太昊伏羲氏炎帝神農氏又依左氏傳列少昊金
天氏於黃帝之後於是三皇五帝之目五德代嬗之序昭然
其不可易矣宋劉恕通鑑外紀司馬光稽古錄蘇轍古史皆
上溯伏羲獨胡宏皇王大紀以盤古天皇地皇人皇有巢燧
人爲三皇紀伏羲至堯舜爲五帝紀夏商周爲三王紀編年
之書追述上古始盤古氏蓋起於此而陳桎續編因之然陳
氏書錄解題譏宏誤取莊子寓言及敘邃古之初無徵不信

則當時有識者早議其後矣羅泌路史在胡宏之後徵引益為奧博自後儒生侈談遂古而荒唐之詞流為丹青蓋好奇而不學之弊

東家雜記

東家雜記二卷孔子四十七代孫右朝議大夫知撫州軍州事傳所撰有紹興甲寅三月自序傳於宣和六年嘗撰祖庭雜記其書雖不傳猶略見于孔元措祖庭廣記中此則從思陵南渡以後別為編輯改祖庭為東家者殆痛祖庭之淪陷而不忍質言之乎攷四十九代孫玠襲封衍聖公其時傳已稱本家尊長而卷中所述孔氏世系訖于五十三代孫洙計其時代當在南宋之季蓋後來別有增入矣卷首杏壇圖說

與錢遵王所記正同又有北山移文擊蛇笏銘元祐黨籍三篇恐皆後人妄增非傳意也卷中管勾之勾皆作勺避思陵嫌名間有不缺筆者元初修改之葉辨宋板者當以此決之傳字世文初名若古元祐四年除仙源縣主簿改今名政和五年以朝奉郎任京東轉運司管勾文字宣和六年以朝散大夫知邠州

孔氏祖庭廣記

孔氏祖庭廣記十二卷先聖五十一代孫襲封衍聖公元措夢得所編前載元豐八年四十六代孫朝議大夫知洪州軍州事宗翰家譜舊引宣和六年四十七代孫朝散大夫知邠

州軍州事傳祖庭雜記舊序家譜雜記本各自爲書元措始
合爲一復增益編次冠以圖象并載舊碑全文因祖庭之名
而更稱廣記蓋仙源之文獻至是始備書成于金正六四年
前尚書左丞致仕張行信爲之序此本最後有五行云大蒙
古國領中書省耶律楚材奏准皇帝聖旨於南京特取襲封
孔元措令赴闕里奉祀來時不能挈負祖庭廣記印板今謹
增補校正重開以廣其傳壬寅年五月望日壬寅者元太宗
六皇后稱制之年距金亾已十年蒙古未有年號當宋清祐
二年也金以開封府爲南京元初尚沿其名後乃改爲汴梁
路此書初刻於開封再刻于曲阜今何夢華所藏紙墨古雅

的爲初印本子嘗據漢宋元諸石刻證聖妃當爲并官氏今
檢東家雜記及此書并官氏屢見無有作开字者乃知宋元
刻本之可寶自明人刻家語妄改爲开沿譌三百餘載良可
喟也

東平王世家

元永貞東平王世家卷首一葉載延祐四年九月初四日拜
住怯薛第二日嘉禧殿裏有時分拜住司徒闊闊解平章將
元永貞所撰東平王世家三卷進上奉聖旨交元復初作趙
子昂寫了刊行者麼道聖旨了也第一卷爲孔溫窟哇太師
國王都行省木華黎事第二卷爲國王孛魯國王塔思事第

三卷爲太師東平武靖王霸突魯丞相東平忠憲王安童大司徒東平忠簡王兀都台大司徒太常禮儀使拜住事是時拜住尙未官丞相也扎刺爾氏自木華黎以後世襲國王此書專爲安童一支而作故于塔思之下注云自王至今國王朶羅解凡十二世別有世系譜牒此下不復具載今元史於塔思下襲國王者並闕而不書據此世家知延祐之世襲王者爲朶羅解也史於木華黎字魯塔思霸都魯安童傳多采此文蓋其書以刊刻得傳它貴族譜牒兵亂皆付之煨燼矣仁宗於元明善趙孟頫字而不名其優禮儒臣良可稱道此書前有元明善序卽奉敕所作後有王頤跋自署夷門則是

汴梁人也

聖武親征錄

皇元聖武親征錄一卷紀太祖太宗事不著撰人姓名其書載烈祖神元皇帝太祖聖武皇帝諡攷元史烈祖太祖諡皆在太祖至元三年則至元以後人所撰故於睿宗有太上皇之稱然紀太宗事而加太上之稱於其弟所謂名不正而言不順者矣所紀多開國時事而於平金取夏頗略元史察罕傳仁宗命譯脫必赤顏名曰聖武開天記其書今不傳未識與此錄有異同否雖不如祕史之完善而元初事迹亦可藉以攷證其譯語之異者如玉孤部卽汪古也博羅渾那顏卽

博爾忽也闖拜即沈白也暗都刺蠻即奧魯合刺合蠻也兀
相撒兀即吾圖撒合里耶律楚材賜名也

孔溫窟哇子五人忽魯虎兒 期里窟爾 木華黎 不花

帶孫 木華黎子孛魯嗣國 孛魯子七人塔思亦稱查刺

王速渾察襲國 霸突魯伯亦難野蔑乾野卜乾阿里乞失霸

突魯子四人安童定童霸虎帶和童襲國 安童子兀都台兀

都台一子拜住此世家所述世次也予向據元明善東平忠

憲王碑稱霸都魯為塔思第二子疑元史木華黎傳以霸都

魯為孛魯子為誤今世家所載正與元史同世家係拜住門

客所編又係進呈本當必不誤矣元明善既奉詔為世家作

序當悉其昭穆之詳而其撰安童碑乃復與此牴牾何耶黃

潛撰鄆文忠王拜住碑稱高祖孛魯曾祖霸都魯正與世家

合此書撰于延祐四年云傳國者一百年稱孤者十五世今

按木華黎之後襲國王者孛魯也塔思也速渾察也忽林池

也速渾察子和童也忽速忽爾也見元史乃蠻台傳 朶羅解

也見元史中閒尚有七人今無可攷矣朶羅解即忽速忽爾之子天

歷初從上都舉兵見殺以脫脫之子朶兒只襲國王後至元

三年以朶羅解之弟乃蠻台襲至正八年卒

平宋錄

平宋錄二卷 丞相賀平宋表 太師淮安忠武王贈諡制

淮安忠武王廟碑劉敏中撰并書 淮安忠武王碑元明
善撰 丞相淮王畫像贊蘇天爵撰以上卷 世祖至元元年
入覲至英宗敕立碑 至正三年正月跋失末頁 丞相伯顏
公勳德碑史周卿撰至元十三年建卅一年重立寇元德跋
至正四年追封淮王制 淮忠武王廟碑王沂撰揭傒斯
書至正四年渡江官員以上卷 按至元十三年詔修平宋錄十
卷相傳劉敏中所修與此卷數不合且當時雖以伯顏為大
將而同事尚有阿朮阿里海涯諸人不應專記伯顏一人若
至正四年追封淮王更在敏中既沒之後此錄必非敏中所
修之本

四庫簡明目有平宋錄三卷云劉敏中撰舊題平慶安者誤
也記至元十三年巴顏下臨安及宋幼主北遷之事所載封
瀛國公詔巴顏賀表及追贈河南路統軍鄭江事皆元史所
遺

祕書志

元祕書志四冊承務郎祕書監著作郎王士點承事郎祕書
監著作佐郎商企翁編次凡十一卷分門十九曰職制曰祿
秩曰印章曰解字曰公移曰分監曰十物曰紙劄曰食本曰
公使曰守兵曰工匠曰雜錄曰纂修曰祕書庫曰司天監曰
興文署曰進賀曰題名前有至正二年五月公文一道計二

復齋郭公言行錄及敏行錄

黃蕘圃買得運使復齋郭公言行錄及編類運使復齋郭公敏行錄各一冊郭公名郁字文卿汴之封邱人金末避兵遷大名由江淮樞密院令史歷官福建都轉運鹽使言行錄者福州路教授徐東所編敏行錄則一時投贈詩文碑記也兩錄皆有黃文仲林興祖序黃序題至順二年辛未自來搜輯元代藝文者皆未之及爰表而出之

明諸司衙門官制

明諸司衙門官制三冊不分卷其目錄稱天下各布政司按

察司府州縣等衙門一千七百二十二處布政司十三處按察司十三處府一百卅九處州二百廿五處縣一千一百八處鹽運司七處提舉司十一處軍民府十一處宣慰司十二處宣撫司八處安撫司廿一處招討司一處長官司一百五十三處不載編次年月據末冊武職衙門所列諸陵衛名孝陵而外唯有長陵景陵獻陵裕陵則是成化時刊本故蘇州府無太倉州松江府無青浦縣也

文獻通攷

予讀唐宋史藝文志往往一書而重見以為史局不出一手之弊若馬貴與經籍攷係一人所編輯所采者不過晁陳兩

家之說乃亦有重出者如陸德明經典釋文三十卷見卷百八十五經解類又見卷百九十小學類宋敏求春明退朝錄五卷見卷二百一故事類又見卷二百十六小說類小說類作三卷郭茂倩樂府詩集一百卷見卷百八十六樂類又見卷二百四十八總集類李匡文資暇集三卷見卷二百十四雜家類而卷二百十五又有李匡義資暇三卷不知義與文乃字形相涉而譌也唐慎微大觀本草與證類本草卽一書而誤分爲二蓋著作之家多不免此弊彼此相笑自昔然矣杜君卿通典志州郡避唐諱改豫州爲荆河州馬氏輿地攷雖承杜典舊文而改荆河爲豫得其當矣乃於古揚州篇云

分置南兖州南荆河州又於壽州下云荆河州刺史祖約云齊因之兼置荆河州云梁置南荆河州云尋改爲南荆河州此數處猶沿杜本之舊殆由卷帙重大一時失於檢照故耳

永樂大典

明實錄永樂元年七月諭翰林侍讀學士解縉等曰天下古今事物散載諸書篇帙浩穰不易檢閱朕欲悉采各書所載事物類聚之而統之以韻庶幾攷索之便如探囊取物爾嘗觀韻府回溪二書事雖有統而採摘不廣紀載太略爾等其如朕意凡書契以來經史子集百家之書至於天文地志陰陽醫卜僧道技藝之言備輯爲一書毋厭浩繁

二年十一月翰林院學士兼右春坊大學士解縉等進所纂錄韻書賜名文獻大成賜縉等百四十七人鈔有差錫宴於禮部既而上覽所進書尙多未備遂命重修而敕太子少師姚廣孝刑部侍郎劉季箴及縉總之命翰林學士王景侍讀學士王達國子祭酒胡儼司經局洗馬楊溥儒士陳濟爲總裁翰林院侍講鄒緝修撰王褒梁潛吳溥李貫楊觀曾棨編修朱紘檢討王洪蔣驥潘畿王侁蘇伯厚張伯穎典籍梁用行庶吉士楊相左春坊左中允尹昌隆宗人府經歷高得暘吏部郎中葉砥山東按察僉事晏璧爲副總裁命禮部簡中外官及四方宿學老儒有文學者充纂修簡國子監及在外

郡縣學能書生員繕寫開館於文淵閣命光祿寺給朝暮膳五年十一月太子少師姚廣孝等進重修文獻大成書凡二萬二千二百一十一卷一萬一千九十五本更賜名永樂大典上親製序以冠之其文曰昔者聖王之治天下也盡開物成務之道極裁成輔相之宜修禮樂而明教化闡至理而宣人文粵自伏羲氏始畫八卦通神明之德類萬物之情造書契以易結繩之治神農氏爲耒耜之利以教天下黃帝堯舜氏作通其變使民不倦神而化之使民宜之垂衣裳而天下治禹敘九疇湯修人紀之數聖人繼天之極皆作者之君所謂制法興王之道非有述於人者暨乎文武相繼父作子述

監于二代郁郁乎文孔子生周之末有其德而無其位承乎
數聖人之後而制作已備乃贊易序書修春秋集羣聖之大
成語事功則有賢於作者周衰接乎戰國縱橫捭闔之言興
家異道而人異論王者之迹熄矣迄秦有焚禁之禍而斯道
中絕漢興六藝之教漸傳而典籍之存可攷由漢而唐由唐
而宋其制作沿襲蓋有足徵然三代而後聲明文物所可稱
述者無非曰漢唐宋而已洪惟我太祖高皇帝膺受天命混
一輿圖以神聖之姿廣述作之奧興造禮樂制度文爲博大
悠遠同乎聖帝明王之道朕嗣承洪基勗思續述尙惟有大
混一之時必有一統之制作所以齊政事而同風俗序百王

之傳總歷代之典世遠祀綿簡編緜夥恒慨其難一至於攷
一事之微汎覽莫周求一物之實窮力莫究譬之淘金於沙
探珠於海戛戛乎其不可易得也乃命文學之臣纂集四庫
之書及購募天下遺籍上自古初迄於當世旁搜博采彙聚
羣分著爲奧典以氣者天地之始也有氣斯有聲有聲斯有
字故用韻以統字用字以繫事揭其綱而目必張振其始而
末具舉包括宇宙之廣大統會古今之異同巨細精粗粲然
明備其餘雜家之言亦皆得以附見蓋網羅無遺以存攷索
使觀者因韻以求字因字以攷事自源徂流如射中鵠開卷
而無所隱始於元年之秋而成於五年之冬總二萬二千九

百三十七卷名之曰永樂大典臣下請序其首蓋嘗論之未
有聖人道在天地未有六經道在聖人六經作而聖人之道
著所謂道者彌綸乎天地貫通乎古今統之則爲一理散之
則爲萬事支流蔓衍其緒紛紜不有以統之則無以一之聚
其散而兼總其條貫於以見斯道之大而無物不賅也朕深
潛聖道志在斯文蓋嘗討論其指矣然万幾浩繁實資玩覽
姑述其槩以冠諸篇將以垂示無窮庶幾或有裨於万一云
爾賜廣孝等二千一百六十九人鈔有差

朱國禎曰永樂大典乃文皇命儒臣解縉等粹祕閣書分韻
類載以備檢攷賜名文獻大成復以未備命姚廣孝等再修

供事編輯者凡三千餘人二萬二千九百三十七卷一萬一
千九十本目錄九百本貯之文樓世廟甚愛之凡有疑按韻
索覽三殿災命左右趣登文樓出之夜中傳諭三四次遂得
不毀又明年重錄一部貯它所國禎所謂重錄本卽翰林院
所貯乃不言翰林而言它所是初寫時本藏大內 國朝乃
移于翰林也今移貯於 文華殿

